

# Carnaval: Awor ta e momento pa planea

**ORANJESTAD(AAN)**— Bida ta paraliza completamente. Negoshi mas importante ta bira esnan den articulonan cu tin di haci cu Carnaval. Paña bunita ta keda den cashi pa t-shirt forma e moda di momento. Novela ta worde reemplaza pa por traha ariba disfraz y comodidad na cas ta worde entrega pa anochinan ariba trailer o canando ariba caya.

Bo por ta na favor di Carnaval o por ta contra.

Confusion, problema, disgusto, polemica: desaroyonan cu tambe a acompaña celebracion di Carnaval na 1988. Mirando cu desunion, cu a haya raiz e aña aki, otro aña por bay crea problema mayor pa Carnaval, Redaccion di DIARIO a analisa loke a pasa e aña

Hecho ta, cu Carnaval a bira un temporada dificil pa elimina for di e bida normal na Aruba.

Pesey uno y tur mester

aki y ta presenta e siguiente relato. Un evaluacion di loke a socede y loke mester socede. Un aporte den forma di critica constructivo, di parti di esnan cu pa nan trabao mester sigui tur acontecimiento di acerca.

contribui pa asina na un forma sano y den un ambiente especial, Aruba por celebra su Carnaval.

Mirando cu otro aña e celebracion mester bira algo culminante, debi na e hecho cu lo ta e di 35 celebracion publico di Carnaval na Aruba y teniendo cuenta cu tur e remarke nan di personanan cu otro aña kier participa activamente, Redaccion di DIARIO kier a presenta e siguiente evaluacion di loke a pasa e aña aki pa asina evita nan otro aña.

## HOPI PARADA POCO FIESTA PUBLICO

E programa cu a worde prepara pa e aña aki, tabata perde un punto for di vista: e importancia pa henter publico ta envolvi den Carnaval.

Hopi parada tabata tin e aña aki, loke di un banda ta kita for di e expectativanan cu mester tin pa e paradanan grandi. Na parecer di DIARIO, mester bini cu menos parada, pero mas fiesta publico, por ehemplo jump up den bariacion, durante temporada di Carnaval. Asina tur hende ta haya oportunidad di disfruta.

Den e cuadro aki DIARIO ta haya cu mester traha un programacion nobo pa Carnaval y bando na e estilo actual.

## STOP DI CAMBIA COS NA ULTIMO MOMENTO

Un punto cu ta crea problema ta, cu unabez e programa worde estableci y tur cos ta cla, ta bini cambio. Mescos ta conta pa rutanen, etc. etc.

Na promer lugar SAC mester percursa pa tur cos bay na e hora programa. Si bisa cu ta cuminsa na cierto hora, cuminsa.

Si establece rutanen, no bay cambia nan despues. Si e programa, cu ta worde reparti na inicio, tin cambio constante, hende ta bruha y ta bini confusion. Esaki a pasa cu ruta pa parada di Playa y pa kimamento di Momo. Si ta sali for di e punto di vista cu publico no tin valor, mester comprende cu mescos cu mester di grupo mester di publico. Loke mester haci ta, tene cuenta cu ambos interes.

## PREMIACION Y LEYNAN NOBO

E hecho cu e aña aki a dicitu cu mester bay San Nicolas pa por haya un premio pa parada di Playa, ta algo sumamente ridiculo.

Pa cuminsa, tin un premiacion especial pa San Nicolas y e premiacion di Playa ta bisa claramente cu e ta pa participacion na Playa.

Mester elimina e ridiculez aki y laga algo cu tabata bon sin cambio.

## E RUTA CU NO TA SIRBI

E ruta cu a worde introduci e aña aki, simplemente no ta sirbi. E ruta tabata demasiado largo y na Paardenbaastraat ya hendenan a cuminsa laga los pa separa nan mes for di e parada.

Ademas e ruta aki ta isola Playa completamente creando asina un caos pa trafico. Mester bini cu un ruta nobo otro aña y mester busca un forma pa Carnaval pasa den centro di ciudad na parecer di DIARIO.

## E PAPEL DI BRASSBANDS DEN CARNAVAL

Brassbands mester bay ocupa un lugar mucho mas fuerte den Carnaval. Nan ta e invencion di Aruba.

Calypso a worde copia di Trinidad, Tumba di Curacao pero brassbands ta loke Aruba a inventa pa su Carnaval.

Mester introduci e Contest di Brassband o hasta un Festival di Brass.

Durante paradanen Brassbands mester ocupa

un bon lugar y nan tambe mester cuminsa busca un uniform representable pa e parada di Carnaval.

## VEHICULONAN DEN PARADA

Un aspecto mahos den parada, ta e vehiculonan di bandanan musical o pa refrescos. Mester impone cu cada grupo ta percursa pa e vehiculonan cu ta bay cu e gruponan, ta bon decora. Si no, nan ta daña imagen di e totalidad.

Aki ta bolbe boga pa e Rey di Tumba, Calypso King y e ganador di Roadmarch destaca. Pa loke ta trata Roadmarch, mester considere tambe como Roadmarch y no bini despues cu premiacion pa Roadjam. Hende no por ta carni y pisca.

## CERA CAYA ANOCHI PROMER CU CARNAVAL

For di Diavierenanochi por nota hopi publico ariba caya. Cana den ambiente di e traileman a bira un happening anual.

Un situacion peligroso tambe, ya cu auto, hende y otro vehiculonan ta topa cara cu cara. Pesey ta bon pa cera e cayanen caminda tin e traileman estaciona, manera e aña aki tabata e caso cu Vondellaan y Smith Boulevard, pa trafico.

Asina ta crea un ambiente mas ameno pero cu menos peligro.

## ELECCION PRINS Y PANTO

Mester busca un forma pa hisa e nivel di eleccion di Prins y Panto.

Na promer lugar a bira tempo pa bandona e chistenan di menos calidad. Mester evita cu pa bira Prins y Panto, mester imita homosexual.

Un forma pa hisa e nivel di Prins y Panto ta, pa pidi gruponan pa cada uno manda nan representantenan y bini cu reglanan pa asina por evita e decadencia den e evento.

Sigui lesa pag. 18

## Carnaval 35: Loke mester haci awor

Na opinion di Redaccion di DIARIO, e siguiente pasonan mester worde tuma inmediatamente.

1. GOBIERNO REUNI CU SAC: Comoquiera cu Carnaval ta un celebracion di Pueblo y Gobierno ta goberna na number di Pueblo, Gobierno mas pronto cu ta posible mester reuni cu SAC pa discuti y evalua kico ta kico. Tur carta mester worde poni ariba mesa, pa asina por mira kico ta bay haci.

2. GOBIERNO MESTER NOMBRA COORDINADOR

E siguiente paso mester ta, cu Gobierno ta bay nombra un Coordinador, cu mester ta un persona cu sa kico ta Carnaval y e organizacion cu e ta rekeri. E persona aki mester traha como coordinador di e plan total cu mester prepara pa otro aña. E mester tin contacto cu SAC, cu gruponan, cu bandanan musical, cu Comercio cu tur loke por tin di haci cu Carnaval y ta fungi como un vocero di Gobierno, esta di Pueblo, den e asuntonan di Carnaval.

3. YAMA REUNION CU TUR GRUPO: SAC hunto cu e coordinador ya menciona mester reuni cu tur grupo cu a participa e aña aki na Carnaval. Mester tuma nota di tur malcontento y sugerencia cu e gruponan por tin. Mester registra tur esaki y mira con por tene cuenta cu nan.

4. REUNION CU TUR BANDA MUSICAL: Mester yama un reunion cu tur banda musical, incluso brassbands, pa asina tuma nan sugerencianan y pensamentonan. Den e grupo aki por inclui tambe tur esnan cu ta percursa pa sound system.

5. REUNI CU COMERCIO: Mester reuni cu Comercio pa asina atende puntonan importante. E participacion di Comercio na Carnaval, e sponsorships, etc. Mescos cu tur otro reunion, presencia di e coordinador y di SAC ta necesario. Na e reunion aki ademas mester comprende cu comercio ta por ehemplo Camara di Comercio, ATIA, ORMA, AHATA, San Nicolas Business Association, y tur instancia comercial. Mester palabra tambe e forma con casnan comercial ta participa na cierto eventonan di Carnaval.

6. PIDI PUBLICO ENTREGA SUGERENCIA: Mester pidi publico entrega sugerencia. E coordinador por percursa pa tur sugerencia keda anota y yuda den e planificacion total.